

LE
POLITIQUE
CHRÉSTIEN.
DE S. GERMAIN.
A
LA REYNE.



A PARIS,
Chez JEAN HENAVLT, au Palais, dans la Salle
Dauphine, à l'Ange Gardien.

M. DC. XLIX.

Avec Permission.

Case

F

34

326

1649/20

THE NEWBERRY
LIBRARY

LE POLITIQUE CHRESTIEN
DE SAINCT GERMAIN.
A LA REYNE.



ADAME,

Les grandes ruines se preparent peu à peu par de grands accidens, dont les remedes sont encor faciles dans le principe de la maladie : Mais quand elle est venuë à vn certain point de malignité, alors l'on void perir le malade, sans qu'on le puisse secourir. Peut-estre, MADAME, que les maux de cét Estat ne seront pas incurables, pourueu que nous ne soyons pas incorrigibles : Mais il y a grande apparence qu'ils le deuiendront bien-tost, si nous ne nous hastons de deuenir raisonnables. Pour les guerir il faut les conneistre, parce qu'il n'y eut iamais de remede certain à vn poison inconnu. Si les Pilotes qui conduisoient Ionas dans leur barque, eussent ignoré l'origine de la tempeste qui les tourmentoit, ils n'eussent peu euiter le naufrage dont ils estoient menacez.

Il y a sept cens ans, MADAME, que les Prelats de France assemblerent vn Concile à Meaux, pour deliberer des moyens de sauuer la France, qui estoit presque attaquée des mesmes symptomes qu'elle souffre maintenant. Les paroles de cette Assemblée marquent assez que les desordres d'alors ressembloient si fort à ceux d'à present, qu'il ne faut point de differens remedes. Puisqu'on ne se lasse point, disoient les Peres de ce Con-

cile, de commettre des pechez dans ce Royaume; Puisque la Paix nous abandonne, & que la misericordé du Ciel, qui auoit accoustumé de venir au secours de nos afflictions, semble nous auoir delaisé; puisque Dieu mesprise nos larmes & nos souffrances, & qu'il n'a plus que de la Iustice pour chastier nos crimes. Nous auons creu que nous deuions luy offrir des pleurs & des sanglots, que nous deuions penser seuerieusement à la conseruation de cette Monarchie, & de son Prince, & procurer de toutes nos forces par l'assistance de I E S V S, le salut des Peuples.

C'est ainsi, M A D A M E, que parloient ces sages Prelats de la France: Et c'est ainsi que nous croyons deuoir parler à Vostre Maiesté. La veritable cause des maux que nous auons soufferts, que nous souffrons maintenant, & que nous deuons apprehender de souffrir à l'aduenir, c'est le peché qui a irrité Dieu: c'est l'iniustice, qui a ietté le desordre dans tous les Ordres de ce Royaume. Le remede c'est le restablissement de la Iustice & des bonnes mœurs en toutes les parties de l'Estat. Deux des plus grands Roys qui ayent iamais gouuerné le Peuple de Dieu, Iosaphat & Ezechias, en ont vsé de la sorte, en occasion pareille. Ils ne se contenterent pas de faire des Edicts pour reformer les abus de leur Royaume: mais encor ils enuoyerent partout des Commissaires extraordinaires, d'une probité reconnue & incorruptible, pour les faire executer. Ils ne desisterent point, que leurs saintes Ordonnances ne fussent entierement obseruées. Et cela produisit vn tel effect, qu'un Estat qui estoit à la veille de sa ruine, deuint le plus puissant, & le plus florissant du monde.

Veritablement, M A D A M E, il faut qu'il y ait quelque chose de diuin & de surnaturel en nos maux: car s'ils auoient pris naissance d'un principe ordinaire, la prudence humaine auroit peu les preuoir & les preuenir. Ou si elle n'auoit peu ny l'un ny l'autre, du moins auroit elle trouué quelque expedient pour les faire cesser. Mais cela est bien estrange qu'on voie encor multiplier les mal-heurs, par les mesmes moyens qu'on employe pour les estouffer. On voit que les remedes ne seruent qu'à irriter le mal. Les difficultez se sont produites les vnes les autres, & se sont enueloppées d'autant plus qu'on les a voulu desbrouiller. Nos desastres ont esté grands dans leur principe, ils l'ont esté dauantage dans leur progrez, & nous deuons craindre que
la suite

la fuitte n'en soit d'autant plus fatale, qu'il est tres-difficile de la bien connoistre. Le mal est bien extreme, quand il y a esgalement peril d'en parler & de s'en taire: quand on n'ose ny le decouvrir, ny en proposer le remede.

Mais parce, M A D A M E, que ie parle en Politique Chretien, & comme l'un des plus affectionnés au bon-heur de Vostre Maiesté, & de l'Estat. Et parce que s'il y a danger à parler, il y en a incomparablement d'avantage à se taire, & que le nombre des flateurs, fait celuy de nos miseres: Il faut vous dire, M A D A M E, avec vne liberté que le temps autorise; que la necessité des affaires prescript; que l'interest du Roy & le Vostre, & celuy de toute la Frâce ordonne. Il faut vous dire avec plus de verité que de complaisance, que quand Dieu se veut vager d'un Royaume, & des Sceptres, il permet que ceux qui les administrent perdent le sens & la raison, & qu'ils prennent la nuit pour le iour, & le iour pour la nuit. Quand il eut arresté & résolu la destruction du Royaume des Juifs, ceux qui le gouvernoient, n'employoient plus pour sa deffense, que ce qui le pouvoit faire perir. Tous ses Chefs n'auoient plus de clarté, qu'autant qu'il en falloit pour se precipiter dans les tenebres; Ils embrassoient pour moyen de salut, tout ce qui pouvoit procurer leur perte. La sagesse mesme ne leur seruoit plus qu'à inuenter des artifices, pour redre leur mal-heur sans ressource. Nous n'osons pas croire, M A D A M E, que Dieu nous vueille traiter de mesme; Nous auons de trop bons sentimens de sa misericorde, & de vostre pieté: Mais nous dirons pourtant à Vostre Maiesté, que nous n'auons peu considerer sans estonnement, que tant de vœux & de Prieres ayent esté inutiles, pour desarmer la cholere de Dieu & la vostre: Et dans vne cōiunction que toutes les raisons du monde le faisoient ainsi desirer & esperer; & dans vn temps que la tempeste ne cōmençât qu'à s'esleuer, elle estoit si facile à coniurer; Nous n'auons peu considerer sans effroy, que la meilleure Princeesse de l'Vniuers, & la mieux intentionnée, malgré sa propre inclination, & tant de sages remonstrances: soit deuenue si seuer, & contre elle mesme, & contre le Roy son fils, & contre son Royaume, & contre tout vn Peuple, qui l'a chérie plus que ses yeux. Et dans vn rencontre où vne action de ceste bonté qui luy est naturelle, pouvoit faire des miracles pour sa propre reputation, aussi bien que pour celle de ceste Couronne. Ce n'est pas sans fremir que nous auons considéré

que l'innocence & l'intérêt du Monarque que Dieu nous a donné, n'a point esté capable de destourner nos calamitez: & que les plus mauuais conseils ont tousiours preualu au dessus des bons. Ce n'est point encore sans espouuente, que nous craignons qu'à l'aduenir il ne faille appliquer des remedes à nos maux; qui soient pires que le mal-mesme, manque de les auoir appliqués, quand il le falloit, quand on le pouuoit, & quand on le deuoit. Quel conseil, M A D A M E, d'auoir entrepris de ruiner Paris, & d'estouffer le Parlement? Et cela en quel temps, & sous quel pretexte, & par quels moyens? Et ce conseil a esté fuiuy, il a esté embrassé, on s'est mis en deuoir de l'exécuter; On a creu mesme qu'il y alloit de la conscience & de l'autorité Royale, de ne rien épargner pour le faire reüssir; On en a fait vn point de Religion & d'Estat. Les sçauans & les ignorans l'ont également applaudy, on a employé le fer & le feu pour le conduire à chef.

O Iugemens de Dieu, que vous estes impenetrables! Mais ô abyssmes de nos pechez, que vous estes profond, puisque vous auéglez de la sorte, puisque vous prouoquez si estrangement l'abyssme de la cholere de Dieu sur nous! C'est bié maintenant, M A D A M E, que la France esprouue qu'il est vray, que la prudence humaine est inutile, pour soulager ceux que la Iustice de Dieu veut affliger. Il est vray ce que dit le S. Esprit, par la bouche d'un Prophete, que ceux qui pecheront, auront beau travailler à faire des toilles, par ce qu'elles ne les pourrôt couvrir: & les ouurages de leurs mains ne les pourront vestir. Tout ce qu'ils feront, s'éuanoüyra sans effet, & mesme les cōseils qu'ils prendront pour se sauuer, ayderont à les faire perir. Ils semeront du vent, dit Osée, & ils ne recueilleront que des tēpestes.

Vn grand Archeuesque de Seuille, disoit autrefois, qu'il falloit que l'Espagne fust entierement desolee, afin qu'on la pust entierement reparer. Il falloit, M A D A M E, que la France s'accablast elle mesme sous le poids de ses propres desordres, afin qu'elle fust capable de sentir son mal, & de rechercher la santé. Il falloit qu'il n'y eust aucune partie saine en cette Monarchie, afin qu'on pensast à vne reformation generale, & que tout le monde la demandant, il fut impossible de la refuser. Il falloit qu'elle tombast dans vn estat qui arrachast les larmes & les sanglots, aussi bien que le sang & la vie à tant de Peuples; Il falloit que ne pouuant perir que par ses pro-

pres forces, elle deuint furieuse, pour s'armer elle mesme contre elle-mesme; afin d'exécuter en vn mois de furie, ce que ses ennemis n'auoient pû faire par les guerres de tant d'annees. Il falloit que le bourgeois, prist les armes contre le bourgeois, l'amy contre l'amy, le frere contre le frere: Il falloit en vn coup de fougue, faire des rauages qui cousteront les regrets de plus d'un siecle, & qui seront peut-estre irreparables.

Il falloit en fin, qu'apres auoir esté le suiet de la ialousie de ses plus cruels aduersaires, elle deuint celuy de leur compassion; Et il falloit que ces mal-heurs luy arriuaissent dans vne saison qui luy faisoit voir les reuolutions de la Catalogne, les changemens du Portugal, les souflemens de Naples, les attentats de Constantinople, les horreurs de l'Angleterre, les Iugemens de Dieu sur les testes couronnées, aussi bien que sur leurs vassaux.

Il falloit que tout cela arriuaist, M A D A M E, pour nous apprendre de force, ce que iamais on n'auoit pû nous persuader par raison: que la Iustice & la Pieté sont les deux Colomnes des Republiques, qui les conseruent autant qu'elles y sont conseruées.

L'Eseriture sainte, qui est le liure de la vraye Police, que vostre grand ayeul Charle-quint lisoit tous les iours; & que les Ministres d'Estat deuroient tousiours auoir, & dans le cœur & dans la main, ne dit rien plus souuent que cette verité. Iamais le Peuple de Dieu ne manquoit d'estre accueilly de quelque insigne mal-heur, quand il auoit commis quelque notable impieté. Son bon-heur ne duroit pas plus que sa vertu; la fin de l'un estoit celle de l'autre. Dieu l'abandonnoit incontinent qu'il s'estoit abandonné à l'impieté; Et sa Iustice qui leur auoit promis vne felicité proportionnée à leur merite, estoit tres-exacte à leur enuoyer des chastimens proportionnez à leurs fautes.

Les Royaumes de Iuda & d'Israël, furent destruits comme le sel ietté dans l'eau; incontinent qu'ils destruisirent parmy eux le seruice de Dieu. Toutes les Monarchies de l'Vniuers ont esprouué vn sort pareil, quand elles sont tombées en pareilles impietez. Quand les Assyriens furent subiuguez par leurs voluptez & leurs delices, ils le furent aussi par les Chaldeés & les Medes. Incontinent que l'Empire de Babylone diminua en vertu, il diminua aussi en puissance. Les Perses ne se ietterent

pas plus tost dans la desbauche, que la misere se ietta parmy eux. Les Grecs, l'Egypte, & l'Idumée, perdirent toute leur prosperité, quand ils perdirent la pieté: Et ils deuinrent esclaves de leurs ennemis, aussi-tost qu'ils le furent de leurs vices. C'est l'accomplissement, MADAME, de cet Oracle du Saint Esprit, qui dit que les Couronnes passent d'une famille à un autre, à cause des iniustices, des fourbes & des tromperies. Tous nos Prophetes qui ont parlé de la part de Dieu, l'ont annoncé de la sorte: Toutes les Histoires du monde la raportent de mesme. Toutes les experiences s'accordent en cette verité. Il faut necessairement qu'un Royaume perisse, quand il a laissé perir la Iustice & la Pieté.

Nicephore remarque que l'Empereur Phocas employa toutes les forces & inuentions imaginables, pour mettre en deffence la ville de Constantinople. Mais ce Prince fut aduerty par une voix du Ciel, qu'il perdoit son temps. C'est en vain, ô Empereur, luy dit cette voix, que tu bastis des murailles, & des bastions; esleue-les, si tu peux, ou si tu veux, iusqu'au Ciel, ta ville ne laissera pas d'estre prise; parce que toutes tes machines de guerre ne seruent de rien contre les forces du dehors, quand les ennemis sont au dedans.

L'Histoire d'Angleterre rapporte, que quand le Ciel voulut punir cette Isle, il permit qu'Henry VIII. leuast tant d'argent sur ses Estats, qu'il ne pardonna ny à Monastere, ny à Eglise, ny à aucun Benefice: Il exigea plus luy seul sur ses subiets, que tous les Roys ses Predecesseurs n'auoient fait deuant luy pendant cinq cens ans: Il altera la monnoye, & en fist battre de tres-mauuais alloy: il haussa le prix de l'or & de l'argent, dont il tira des profits immenses: Il fist payer la dixiesme & onzieme partie de tous les cens & rentes; Il prist deux decimes de tous les biens mobiles de son Peuple; Il ordonna encor que chacun luy payeroit la troisieme partie de son bien; Il se saisit de tous les reuenus des Hospitaux & des Colleges, & mesmes des deniers destinez pour la deliurance des Ames de Purgatoire. Et après cela son Royaume ne laissoit pas de perir de plus en plus, parce que ses pechez l'accabloient.

Cela est donc tres-certain, que l'impieté & l'iniustice font perir les Estats, comme la Iustice & la Pieté les font subsister. Mais il est aussi trop certain, MADAME, par l'experience d'autant de personnes qu'il y en a en ce Royaume; que ces deux

vertus

vertus ont esté bannies absolument du gouuernemēt de la France. L'on a desespéré le Peuple par des oppressions qu'on n'eust pas souffertes en Turquie. On la reduit à paistre l'herbe, & le glā. On a contraint les femmes à écraser leurs enfans; & à s'estouffer elles-mesmes. On a répli les prisons & les cachots de gēs qui n'estoient coupables, que parce qu'ils estoient mal-heureux. La pauureté qui faisoit leur misere, faisoit encor leur crime. On les a assassinés & massacrez, parce qu'ils ne donnoient pas l'argēt qu'ils n'auoient point, & qu'ils ne pouuoient dōner. L'on a pris les Prestres à la barbe, lors qu'ils sont venus au secours de leurs Paroissiens, immolez à la fureur des fuzeliers & des Partisās. La vefue & l'orphelin ont pleuré, & il n'y a eu que le Ciel qui les ait escoutéz. Ils n'ont point trouué d'autre Iustice parmy les hōmes, que celle qui pouuoit authoriser la vexatiō. Leurs sāglots & leurs soupirs pouuoient biē les suffoquer: mais ils ne pouuoient pas toucher les cœurs de ceux qui exercoient l'autorité Royale. Que peut-on dire de l'insolēce que nos gēs de guerre ont cōmise dās les armées? Ils ont brulé les Eglises, réuersé les autels, pollué les vaisseaux sacrez, violé les Religieuses, saccagé les Monasteres, tué les Religieux, foulé les Reliques aux pieds, dōné le S. Sacrement aux cheuaux. Ils ont fait ce qu'on ne peut dire sās horreur, & que vo⁹ ne pouuez entēdre sās fremir.

Il est aisé, MADAME, de iuger comment nous faisons la guerre parmy les Estrangers, par l'exemple de celle qu'on a faite à Paris. On a meslé le sang des meres avec le lait des enfans; On a forcé les Vierges, & les filles de huit ans, iusques dans les Eglises; On a foulé le Corps de Iesus-Christ aux pieds; On a exposé nuds les prisonniers à la rigueur de l'Hyuer, & à l'opprobre de la nature. On a fait ce que les Tartares n'auroient pas voulu faire, en l'irruption d'un Siege. Et tout cela s'est fait, MADAME, sous la Regence de la meilleure Princeesse du monde, qui auoit tesmoigné tant de compassion de la misere de ses subjets, lors qu'elle ne les pouuoit soulager. Et tout cela se feroit encor à l'aduenir, si Dieu n'y mettoit la main. Car les hommes qui nous gouernoient, n'estoient point disposez de la l'y mettre. Ils auoient depouillé tout sentiment d'humanité, pour nous gouverner, non plus d'une façon humaine, mais d'une maniere feroce & sauuage.

Nous ne voulons point, MADAME, exagerer ces desordres, Nous sçauons que Dieu a donné l'esprit de Religion & de Pieté à V. M. mais nous pouuons l'asseurer qu'il n'y a iamais eu Royaume qui n'ayt succombé à quelque notable calamité, quand il a suc-

combé à de pareilles abominations. Et nous auons tousiours tenu pour certain, que Dieu vangeroit tant d'insignes desordres par quelque insigne chastiment. Il faudroit qu'il c'eust d'estre Dieu, & d'estre Iuste, pour ne pas soustenir ses propres interets, & ceux de tant de pauures miserables, qui ne pouuoient plus esperer secours que de luy seul. La seule impunité de quelques desordres, beaucoup moins, a bouleuersé des Estats.

Le Roy Achab ayant manqué à faire iustice en la maison de Benadab, Dieu luy adressa ces effroyables paroles: Parce que tu as pardonné à vn hōme qui meritoit la mort, tu perdras ta propre vie, & tu subiras en propre personne la peine que tu luy as espargnee. Les Politiques Chrestiens tienēt pour certain, MADAME, que les Royaumes ne perissent point tāt pour les crimes qui s'y commettent, cōme pour la negligence à les chastier. La Tribu de Bēiamin fut destruite par le fer & le feu, parce qu'on n'y auoit pas puny vn hōme qui auoit abusé d'une femme. Les Lacedemoniens virēt périr vne Republique, parce qu'ils auoient laissé impunis ceux qui auoient violé les filles de Lescedas. La faute de Pâris causa la ruine de Troye. Et l'on dit que nos anciens François saccagerent la ville de Rome, & desolerent toute l'Italie, d'autant qu'on auoit laissé eschapper vn ieune garçō, qui auoit ravi la Princesse de Toscane.

C'est assez, MADAME, que la France ait toleré, ou dissimulé, ou qu'elle n'ait pas châtié les crimes des François, pour en estre complice. On fait le mal, quand on ne l'empesche pas, lors qu'on le peut, & qu'on le doit. Et Dieu nous a bien aduertty que sa Iustice estoit prest de nous punir, par les prognostics qui ont paru depuis quelque tēps, qui peuuent tenir lieu de prodiges. Le Saint Sacremēt a esté desrobé deux fois en deux Eglises de Paris en vn mesme mois. Cela marquoit que la necessité ou l'impiété estoit à vne estrāge extremité. On a forcé la closture du Monastere des Vierges au milieu de Paris. La sainte Hostie tomba de l'Autel, lors qu'on celebroit la Messe deuant Vostre Majesté. On ne parle point de quantité d'autres accidens qui ont effrayé & surpris les plus sages, & qui estoient des presages funestes de ce que nous auons veu du depuis, & de ce que nous craignons de voir en suite. Enfin quand la mesure est comble, il faut que Dieu frappe son coup.

Il est vray, MADAME, qu'il ne faut que le crime d'un particulier, pour attirer des calamitez generales sur vn Estat. Si la faute d'un Soldat nommé Acā fit périr l'armée de Iosué qui estoit un prince si Saint. Si saint Ambroise remarque que la barque où estoient

les Apostres, pensa faire naufrage, parce que Judas estoit dedans. Si Ionas mit en peril le vaisseau où il estoit; quoy qu'il y eut peut-estre plusieurs innocens en la compagnie, que doit on iuger d'un Royaume, où il y a tant de criminels, & si peu d'innocens, où mesme la Vertu a passé pour crime, & le crime pour Vertu; où l'innocence a esté en peril, cependant que le vice triomphoit? Où les gens de bien ont esté opprimez, cependant que les impies viuoient dans l'éclat? Où ceux qui ont voulu prendre le party de Dieu & de la Justice, comme les Presidens Barillon, De la Berchere & tant d'autres, ont esté traittez comme coupables, & ennemis de l'Estat: Parce qu'ils vouloient par principe de conscience accorder les interets d'un Roy Tres-Christien, avec ceux de Iesus-Christ, le salut du Royaume avec celui du Peuple, & la Religion avec la Police.

Il ne faut point dire, M A D A M E, que les crimes ont peut-estre esté plus grands dans la France, qu'ils ne sont à present, & que neantmoins elle s'est maintenüe. Les Amorheens estoient aussi grands pecheurs du temps d'Abraham, que de celui de Iosué; Et toutesfois ils ne perirent que sous Iosué, & non pas sous Abraham, parce que leur iniquité n'arriua à son periode, que sous le temps de ce grand Capitaine. Dieu considere vne Republique comme vn corps composé de plusieurs parties: Il suffit que le peché des particuliers continuë pour la faire perir, parce que le crime est aussi considerable en sa quantité qu'en son espece. Le S. Esprit declara à ceux de Gaza & de Damas, que leur suplice estoit attaché à vn certain nombre de pechez; & que l'un & l'autre se suiuroiët inseparablement. Quand donc nos fautes seroient moindres que celles de nos ancestres, ce qu'il ne faut pas entreprendre de iuger, c'est assez d'auoir réply la quantité, que la Justice de Dieu auoit marquée pour nostre chastimët. Iesus-Christ menaça les Iuifs, qu'ils porteroiët la peine de tous les homicides qu'auoient commis leurs Peres, depuis Abel iusqu'à Zacharie, d'autant qu'ils les auoient continuez, & qu'imitans leurs desordres, ils s'estoient rendus complices de leurs fautes.

Il ne faut point dire encore, qu'il y a des Estats plus coupables que celui de France: Car s'ils ne sont punis presentement, ils le seront en leur temps, quand la mesure sera comble. L'Angleterre l'a esté, le Portugal, la Catalongne, Naples, la Candie, & tant d'autres éprouuent maintenant, aussi bien que nous, qu'ils sont aussi loin de leur guerison, que de leur amendement. En fin la France a comblé ses iniquitez, & Dieu comble ses suplices. Si nous eussions entendu la Politique du Ciel, nous aurions bien reconnu que ses verges

nous menaçoient il y a long-temps : Puisque nos gens de guerre, qui estoient capables de conquieser tout vn monde, ont bien eu de la peine à conseruer nos frontieres : Puisque nos victoires mesmes meritoient plus de larmes que de ioye : Puisqu'on se glaçoit au feu de nos trophées : Puisque les leuées de deniers, qui pouuoient suffire à achepter toutes les terres de nos ennemis, n'ont pû payer la monstre de nos soldats ; Puisque pour faire la guerre aux Estrangers, il l'a premierement fallu faire à nos compatriotes, leur rauissant & leur substance & leur subsistance ; Puisque sans nous fortifier beaucoup au dehors, nous nous destruisions au dedans ; Puisqu'en nous rendans odieux au Estrangers, nous deuenions insupportables à nous-mesmes : Puisque par vne conduite du tout extraordinaire ; on ne s'est point soucié d'estouffer l'amour & le respect de l'autorité Royale dans le cœur des Peuples : quoy que ce fut la derniere faute qu'on deust iamais faire : Puisqu'en fin on donnoit sujet à la France de croire, que quelque changement qui püst succeder, il ne pouuoit estre que tres-heureux par comparaison de l'estat où elle se voyoit ; & qu'il ne luy pouuoit arriuer pis que de demeurer comme elle estoit : Puisque toutes les Remonstrances qu'on pouuoit faire pour preuenir ou adoucir nos maux, ne seruoient qu'à les fomentier & les accroistre.

Nous prions Dieu, M A D A M E, de donner de bons Conseils à Vostre Maiesté. Nous prions le bon Ange de la France & le vostre, de vous faire conceuoir, que le mestier du monde le plus perilleux, c'est celuy de la vengeance, qu'on a voulu exercer sous le nom de V. M. & sous le vain prétexte de l'autorité blessée. Souuēt on trouue la vengeance de Dieu, en cherchant celle des Hommes. De sages Empereurs ont conserué leurs Couronnes en pardonnāt ou dissimulant les iniures ; comme les Constantins & les Theodoses : Et d'autres les ont perduës, pour auoir refusé à contre-temps vne legere cōdescendance à leurs sujets : Comme le Roy Roboam, qui risqua dix parties de son Royaume, pour s'opiniastrer à l'opression de ses Peuples. Nous la prions de pēser, que les Estats ont leur periode, aussi bien que le reste des choses ; que le temps present se monstre fatal sur les Sceptres : & qu'il ne faut quelquesfois que la mauuaise conduite de peu de iours, pour destruire vne Monarchie de plusieurs siecles. Fasse le Ciel, M A D A M E, que celle que vous gouuernez, n'ait point d'autres limites que celles de l'Eternité ; comme nous desirons que nos respects & nos obeïssances n'ayent point d'autres bornes pour V. M. que la fin de nostre vie.

F I N.